

T 4686

7928

CHINESE - JAPANESE LIBRARY OF
HARVARD - YENCHING INSTITUTE

HARVARD UNIVERSITY

OCT 3 1939

Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17
Lab D502	95/0/2	81/0/0	66/0/0	51/0/1	35/0/0	20/0/0	29/19/54	55/39/33	40/9/43	42/51/29	82/4/79	51/50/13	50/-28/-29					
	38/14/16	66/16/18	50/-5/-22	43/-14/21	55/-9/-25	71/-32/0	62/34/60			52/48/17	31/21/-21	72/-23/57	73/19/68					

皇明世法錄卷之八十一

哈佛大學漢和
圖書館珍藏印

史官 陳仁錫 輯次

東夷

朝鮮

朝鮮直遼東南古箕子國。初箕子胥餘。既陳洪範。避地朝鮮。商衆從者五千人。武王因封焉。乃教民禮義田蠶。俗貞潔。其號朝鮮。以日東出鮮潤故名。周衰地邊燕。燕自立為王。欲東畧地。朝鮮侯亦稱王。將起兵逆擊燕。尊周室。大夫禮諫使西說燕。罷其兵。後子孫稍驕。燕遣將秦開西闢地二千餘里。

築鄣塞。朝鮮寢微。秦并天下。築長城。抵遼東。朝鮮王不服。屬外徼。否死。子準立。會陳項起。燕齊趙民多亡附。是時去始封已四十餘世矣。漢興。修遼東故塞。界沮水。屬燕王盧綰。綰反。走匈奴。燕人衛滿聚黨千餘。推結胡服。度沮水。說準居西鄙。扞邊。準拜爲博士。遂得秦故空地。益誘燕齊亡命役屬。詐稱漢兵。至還攻準。準亡入韓。滿遂自王朝鮮。都王險。孝惠時。滿約爲外臣。保塞。益威行旁小國。兼有濊北。與高句驪沃沮地。凡數千里。傳子及孫。右渠。漢使涉河。誘諭不奉詔。已又襲殺何武帝。遣樓船

將軍楊僕。勒兵五萬。從齊浮海。左將軍荀彘出遼東。擊之。城守不下。乃使濟南太守公孫遂。以便宜并軍急擊。其相殺右渠降。因分置樂浪臨屯玄菟真番四郡。時元封三年也。昭帝省爲樂浪玄菟二郡。而玄菟徙居高句驪西北。其沃沮貊竝屬樂浪。以斥遠。分置樂浪東部都尉。漢末。公孫度起玄菟。越海收東萊諸縣。自侯遼東。傳孫淵。封樂浪公。淵又自立爲燕王。魏滅之。晉永嘉亂。陷入高句驪。高句麗本扶餘別種。世以高爲氏。至高璉。併有朝鮮。居平壤。死年百餘歲。平壤亦曰長安。城南臨沮

水。卽樂浪郡地。外復有國。內城漢城爲別都。號三都云。自璉後稱高麗。貢獻無常。隋封其六世孫湯爲高麗王。煬帝渡遼水親征。至再不克。振旅而還。唐武德初。其王建武遣使入朝。命道士以像法往。爲講老子。建武築長城千里。東北首扶餘。西南屬海。尋爲蓋蘇文所弒。旁擾新羅。太宗詔北輸粟。營州以總管張亮帥募兵四萬。吳艘五百。泛海趨平壤。李勣帥騎士六萬趨遼。身誓師。東拔遼蓋二州。歸高宗。已平百濟。會蓋蘇文死。子男生與弟修郤。遂以李勣節度轉燕趙。食膾遼東。乾封三年。勣率

別將薛仁貴等拔扶餘城。大破之。王藏請降。剖其地爲州縣。置安東都護府。總章中。徙高麗民三萬於江淮。餘衆反奔新羅。及突厥靺鞨。儀鳳二年。封藏朝鮮郡王。畱安東死。子德武爲都督。後稍自國。元和末。遣使獻樂工。其國東徙鴨綠江。東南千餘里。歷後唐同光中。高氏屢奉職貢。長興三年。權知國事。王建代立。明宗乃拜建玄菟州都督。高麗國王王建益并新羅百濟地。自廣東徙松岳。以平壤爲西京。子孫終五代。修貢不絕。周世宗嘗以帛數千匹。市銅高麗以鑄錢。宋太宗卽位。其王佖遣國人

金行成就學擢進士。是後詣監肄業以爲常。會契丹伐女真。道高麗界。女真意高麗構禍。因貢馬愬於朝。太宗出所上告急木契示高麗。使歸白王治還所俘。而王治方奉表契丹。得所取女真國鴨綠江東地數百里。淳化後遂爲脅制。朝貢中絕。咸平六年。遣使來朝。言晉割燕薊屬契丹。遂有路趣玄菟。乞王師屯境上。牽綴契丹索前地。其王詢徙昇羅州以紓禍。太中祥符三年。與女直設奇遮擊契丹。築城鴨綠江東。自是絕不通中國。垂四十三年。熙寧初。詢孫徽來修好。神宗亦欲結之以謀契丹。

改登萊貢道。繇明州。元豐元年。造兩艦報聘。自定海絕洋而東。而徽奉契丹正朔。往往兩屬通使。元祐八年。高麗獻黃帝鍼經。詔頒天下。其使請鬻歷代史及冊府元龜等書。禮部尚書蘇軾疏却之。有旨書籍經買者聽。宣和中。求二醫往。歸日。王楷語曰。聞朝廷將用兵遼。遼兄弟國。存之足爲邊扞。女直虎狼。不可交也。願二醫歸報天子。早爲備。及回奏無及矣。先是遼侵高麗。置保州。金已克黃龍府。高麗請還舊疆。不許。及遼亡。王楷稱藩如遼例。而宋自高麗改貢道。明越困於供給。兼慮爲金間。罷

一切使命。紹興三年。楷修貢。仍溫詔答焉。當是時。其國都開城府依山險。名曰神蒿。卽松岳也。東京新羅爲東州樂浪府。南京百濟爲金州金馬郡。西京平壤爲鎮州。而西京最盛。元興契丹衆九萬餘。竄據江東城。元遣偏師會高麗滅之。歲輸貢。後絕信使。太宗命撤禮塔往征。抵王京。其王瞰奉牛酒勞師。尋叛竄海島。憲宗末。遣世子僎入朝。瞰卒歸國。更名植。世祖徵植。修世見禮。朝上都。至元初。立瀋州處高麗降民。遣使通好。日本。諭旨爲鄉導。期得要領。併相視耽羅道路。植爲其臣林衍所廢。立

弟涓。議征之。無何。植復位來朝。詔西京內屬。改東寧府。畫慈悲嶺爲界。以安撫使佩虎符。戍其西境。中書省請屯田金州。安撫使阿海畧地。平珍島。植致書日本使通好。經畧使忻都入海。拔耽羅城。詔高麗僉軍助征日本。以皇女嫁世子懃。襲父爵。改鑄駙馬高麗王印。賜之。懃子諤。諤子燾。嗣王。燾傳弟嵩。以訖元。國朝洪武元年。遣符寶郎僕斯。賜高麗王顯璽書。二年。顯表賀貢方物。詔齎金印。封爲高麗國王。頒大統曆。復諭王固圉。蒐乘。謹備倭。無崇信釋氏。賜六經四書。通鑑漢書。使者

言王顥有侄女，遭亂沒軍中。

上令中使訪歸本國，仍厚衣餼。三年遣使代祀其國山川，會定取士格。詔許高麗安南等國貢赴京師會試。以沙漠平往諭。四年，賜高麗貢士金濤第，以不通華言，給道里費回籍。中書省奏禁使者闌出貨物不許。五年，安置歸德侯陳禮，歸義侯明昇於高麗。王顥請遣子弟入太學，表言耽羅國多畱蒙古人，及蘭秀山逋寇宜詰治。詔耽羅已屬無滋疑忌，逋寇可傳檄定，其罷兵以貢馬不誠卻其使。七年，諭中書省高麗頻涉險來貢，宜令三年

或比年一聘。八年，王顥被弒，以養子禍嗣貢愆期，敕遼東守臣勿與通。十年，請顥謚號。

上曰：顥弒久，今始請謚，將假朝命鎮服其民，且掩逆跡，其勿與降敕切責。遣都督僉事濮真往訊死之。十二年，高麗屬夷龍州土官鄭白等內附，守將潘敬葉旺以聞。敕無受降，開釁。十六年，陪臣張伯崔泊來貢，以頃歲不庭渝約，卻不受。命禮部咨諭之。十八年，許禍嗣王。賜故王顥謚恭愍，貢布萬疋，馬千匹。謝。明年，請易冠服，不許。二十年，指揮僉事高家奴等市馬高麗，還言禍辭馬直，諭鎮守

延安侯唐勝宗償直如敕。初遼瀋民多避亂高麗。及往市馬。故元降將咬住等言。

上索之。至是高麗送馬。竝流民二百八十餘來歸。二十一年降人言王禍欲寇遼東。其將李成桂還兵囚禍。敕嚴備往偵狀。是歲廢禍立昌。昌復廢立。瑤權國事。蓋恭愍王顛無嗣。爲嬖臣洪倫等所弑。國相李仁人誅倫。迎立養子禍。禍昏恣興師內寇。以李成桂爲副將。至鴨綠反兵。禍惶懼。遜子昌。國人弗順。恭愍妃安氏擇立王氏孫定昌君瑤。二十四年瑤遣子奭朝。明年正旦。詔班尚書下。奭未

歸。而李成桂復廢瑤。自立其國都。評議司奏瑤信讒妄殺。子奭亦痴騃。非門下侍郎李成桂莫可主國。

上曰。高麗僻處東夷。聽自爲聲教。成桂遂更名旦。徙居漢城。請更國號。詔仍稱朝鮮王氏。自建開國。歷四百三十餘年而絕。李成桂者全州人。自言遠祖翰仕新羅爲司空。六世孫競休入高麗。至成桂凡十七世。竟代王有國。

上以遠夷置不問。心固弗善也。且遣使請朝鮮印及封誥表不孫。下吏索撰表人鄭總。安置雲南。二十

六年遼東奏朝鮮陰誘女直人五百潛度鴨綠江將寇邊下敕切責諭守臣謹備絕貢使二十九年請印誥不許且老聽以子芳遠襲卒謚康獻求樂元年芳遠表言洪武中賜金印龜紐項經建文更制乞如舊頒給詔予印誥及冕服九章春秋會通等書二年

上欲屯田遼東徵牛朝鮮芳遠以萬頭獻敕遼東都司分給屯田每頭酬絹一疋布四疋賜其王文綺表裏六年世子提來貢七年諭進馬供用芳遠獻萬匹助征虜十六年請老子子禔嗣時遷都北

京距朝鮮爲近二十一年征阿魯台駐蹕沙城禔遣陪臣崔雲奏事令還京胥命宣德元年芳遠卒謚恭定賜嗣王禔五經四書性理大全通鑑綱目因謂禮部尚書胡濙聞禔勤學故賜之令小國民蒙惠亦朕所樂也二年敕進馬五千匹四年禔獻海東青詔珍異非朕所貴其勿進使還賜王磁器敕貢獻唯土物無以金玉七年遼東都司言諸屯缺耕牛諭朝鮮選給萬頭償以絹布五萬疋如前例時毛憐建州夷詐爲忽刺溫野人犯朝鮮境朝鮮以兵攻建州遣使敕諭八年總兵官巫

皇明世宗 卷八十一
凱奏朝鮮擅兵。

上曰遠夷爭競。但謹邊備而已。禡欲遣子弟入就學。不許。仍賜書俾學國中。九年。聞黑龍江七姓野人議侵朝鮮。敕禡嚴爲禦。正統二年。建州左衛都督猛可帖木兒爲七姓野人所殺。其子童倉與叔凡察逋居朝鮮界。尋得罪亡歸。四年。建州都指揮李滿住等言朝鮮招叛。朝鮮亦言凡察誘侄童倉逃匿。慮與李滿住同謀。生釁。諭仍還境城。凡察等言禡阻畱部落六年。禡復愬凡察舊居境城阿木河。低離失所。撫恤備至。近徙東陞。忽潛依李滿住。誰爲追阻。滿住居婆猪江。屢引忽刺溫掠臣邊。今凡察與同惡。背恩已甚。

上敕禡。國家倚王爲東藩。如凡察滿住。異類畜之。無與較。七年。以建州朝鮮構怨。命錦衣衛指揮吳良等齎敕諭朝鮮。集境城人口質審去留。戒凡察無妄索。會瓦刺密令女直諸部誘脅朝鮮。禡拒之。白其事。

上敕獎禡忠誠。賜綵幣。并諭禡東寧等衛諸逋逃。無問漢人女直。竝擒解。無貽累爾國。十年。倭犯朝鮮。來獻俘。時虜寇邊。詔朝鮮備馬三萬。景泰元

年貢馬五百。奏比歲馬耗損。未能猝辦。止勿復貢。珣卒。子珣嗣。遼東報虜掠開原瀋陽。及圍撫順。女直李滿住凡察董山等。爲迫脅入寇。敕珣飭邊防。勦三年珣卒。謚恭順。子弘暉嗣。五年。賜弘暉宋史。從其請也。弘暉穉而孱。七年遜其叔珠。遣內臣冊珠爲王。天順三年。登州衛運遼軍。有花舟漂至朝鮮。撈抹得十之七。珠給衣糧送歸朝。賜敕獎諭。是歲。珠納建州酋董山私授中樞密使。謀得其制書。遣科臣往。珠飾詞。出制書示之。驚服。貢馬謝罪。四年。朝鮮誘殺毛憐衛都督郎卜兒哈。兩降。敕解讐。五年。建州衛野人乘夜掠義州。諭朝鮮無挑禍。成化三年。卻所進海東青白鵲。王師征建州。珠遣中樞府知事康純等。率兵萬餘。協攻。遂斬李滿住。及擒勦部落。以俘獻。聖書褒異。加賜金綺。珠尋卒。賜謚惠莊。子昞嗣。始冊封。率遣內臣。時遼左薦饑。御史侯英疏稱。中使繹騷。朝鮮號秉禮國。乞簡廷臣往。

上是之。著爲令。六年。昞卒。謚襄悼。以子幼。立兄子娶嗣王。七年。娶奏李滿住子索而哈。聚衆修怨。乞邊臣應援。十一年。復奏建州野人糾毛憐等衛夷侵

擾。時禁外國五市銅錢弓角等物。十三年。婁奏小邦北連野人。南隣島倭。

高皇帝嘗賜火藥火砲。今乞弛禁市弓角。令歲市五十無過多。十四年。朝鮮貢使還。被寇掠。官較捕獲。都御史王越請梟示彰國法。仍還原劫以慰遠人。十五年。建州酋伏當加等復盜邊。詔朝鮮夾擊。婁遣右議政尹弼商等渡江擣巢多擒斬。明年春來獻捷。賜宴禮部。亡何。建州掠朝鮮。從騎以報擣巢之役。弘治初。歲貢獻如例。七年。婁卒。謚康靖。八年。封子愷為王。十二年。愷請搜還下海民戶。遼

東守臣亦奏軍民逃聚海島。得及時解散。從之。愷病風。令弟懌權署國事。正德二年。懌嗣王。十三年。修貢。請更會典所載宗系。嘉靖改元。遣修撰唐臬宣諭以親藩入繼大統意。始

毅皇帝時。懌請冊世子。中使金義陳浩夤緣內降。往賜懌等金幣。括取異物。及童男女。至是以禮官言報罷。十五年。以皇子生。頒詔朝鮮。先是。皇嗣冊封始遣使外夷。

上特令詔諭因著令甲。明年修撰龔用卿等使朝鮮。還請凡事關禮制一體諭知。即令陪臣賫示報可。

皇明世宗 卷八十一
十八年。表賀上。廟號尊謚。及

睿宗祔廟明堂禮成。御奉天門延見使者。二十三年。朝鮮民洪贊等航海。漂入通州海門界。傳詣京師。給衣糧護歸。明年。漳州民李王乞等通番。漂朝鮮。送遼東都司。權國事世子皓以王懌計來告。皓嗣未踰年卒。立其弟峒。二十六年。峒獲福清通番人馮淑等并貨物解遼東。谷稱閩人向無汎本國者。頃前後獲千人。皆市易日本。闌出火藥軍器。恐起兵端。

上令查勘海道。賜峒金幣旌忠順。三十一年。峒以國初所賜樂器敝壞。奏求律管。仍乞遣官赴京肄習。以遵朝制。三十六年。大內災。峒上表奉慰。三十八年。倭犯朝鮮。擊之盡殪。因賀冬至。奏聞并歸所掠。獎賜有差。明年。賀使至遼。直虜傷從官一。詔自今朝鮮貢使。並迎護出境。隆慶元年。表賀肅皇帝尊謚。部議尊謚。廟號。無稱賀禮。然不當以律遠夷。賜幣報聞。其冬。峒卒。謚恭憲。從子昫嗣立。初。李成桂易姓。

高皇帝心惡其篡。而傳者復訛以爲仁人子。因著祖訓。稱李仁人及子成桂。凡先後殺王氏四子。以爲

永鑒其後嗣累表白世系非仁人後并言恭愍弒
繇嬖臣仁人誅倫立禍迨禍寇遼先臣成桂反兵
傳昌至瑤竟以國人擁戴請命代立未嘗身與弒
逆願得湧雪萬曆三年重修會典乃更定如今文
云二十年倭乘朝鮮弛備天縱兵巨酋行長清正
等分道陷豐德諸郡松倉皇走義州願內屬
上采廷議遣兵部侍郎宋應昌等濟師復王京松得
返國當是時朝鮮八道幾覆非

天子深念藩籬前後特簡重臣經畧朝鮮勢必不守
大抵朝鮮恭謹異它夷國家寵禮亦加等自洪

熙後歲遇元旦及萬壽千秋節皆遣使表賀貢
方物它慶慰謝恩無常期嘉靖十年始令外夷元
旦朝賀例改冬至大事必頒詔其國請封告哀率
遣近臣及行人冊封弔祭朝鮮使至例得瞻拜太
學禁網亦疎弘治中因女直貢夷讐殺槩譏出入
嘉靖十三年陪臣蘇洗讓請得出館游觀如舊禮
部尚書夏言覆許正使員役五日一次出館令通
事一人陪侍以示禮遇且寓防衛

上輒可其奏攷四履東西相距二千里南北四千里
其東西南並濱大海北隣女直南隣倭西北限鴨

綠江。江出靺鞨之白山。平壤在其東南。自昔憑以爲險。分八道以統州郡。曰京畿。曰忠清。曰慶尚。曰全羅。曰黃海。曰江原。曰平安。曰咸鏡。設官舉士。畧倣中國。因田制俸。俗柔讓。以蹲踞爲恭。崇釋尚鬼。惡殺。多所諱忌。士人喜讀書。工詩文。衢路悉構嚴室。號扁堂。未婚者。曹處誦經習射。歲以季秋。奠高年。吉凶悉稟家禮。釀用秬。廣袖。戴折風巾。茅居。苧衣。色尚白。法無苛條。其敗常犯昧。及再嫁。書名三司子孫不齒。人首無枕骨。背扁側。境內山川。九都神。嵩北嶽。海鴨綠江爲大。又有江曰大定。曰大同。

而漢江最勝。自鴨綠東流入於海。歷數千里。至漢城。滙爲巨浸。南卽古百濟。又東爲古新羅。近唐熊津都督府。土產金、銀、銅、鐵、水晶、鹽、紬、苧布、褶扇、龍文、簾、席、白唾紙、狼尾筆、紫花硯、果下馬、長尾雞、貂、豹、海豹皮、八稍魚、杭黍、松、榛、蕙、苾、茯苓、人參。其貢道。渡鴨綠江。則自鴨鵝關趨遼陽。歷廣寧前屯。入山海關。以達京師。凡迂回三四鎮。戊成化中。苦女直邀劫。請改繇遼陽南。徑趨寧前。職方郎劉大夏以祖制有微意。持不可。議遂罷。

論曰。世推朝鮮。封始箕氏。及讀黃少詹洪憲輜

錄乃得所謂檀君。檀君者。其傳堯戊辰歲有神降太伯山檀木下。國人君之。至今奉祀不廢。檀君與箕子並都平壤。史稱衛滿都王險。王險亦平壤也。漢取爲樂浪郡。范曄東漢書敘東夷特詳。曰夫餘曰高句驪。曰東沃沮。曰濊。曰馬韓。辰韓。弁辰。其言濊及沃沮。句驪。本朝鮮地。而夫餘屬玄菟。韓有三種。馬韓最大。而朝鮮王準爲衛滿所破。將餘衆數千人入海。攻馬韓。自王。則諸國當通系朝鮮。其後併入高句麗。兼有新羅百濟。拓境亦侈大。已乃以隋唐師武臣力。頗抗前旌。號爲勁敵。頃歲海波稍警。翦焉幾覆。強隣虎眈。不遑固圉。何今昔強弱逕庭哉。或以向習華風。轉趨文弱。摩厲自強。無孤卵翼。亦有土自完之哲也。攷箕子封朝鮮傳四十一代。至準凡九百二十八年而失國。準入韓地。金馬郡自立。號韓王。又傳二百年。併於百濟。前後凡傳祚千一百二十餘年。三代受命。未有若斯之多。歷者用夏變夷。於今爲烈。吁嗟盛矣。

西戎

論曰西域遠在天末。自可存而不論。而叩關來王。匪干戈是尋。而共球是飭。亦可覘

國家咸賓之盛矣。唯是賈胡借端漁利。所在繹騷。不無詭虛名而受重困。而夷德無厭。如土魯番之吞噬哈密。乍盟乍寒。玩我股掌。寢假不可復問。所貴謹華夷之界。而縻以戎索。無使生心窺隙。治以不治。乃王者駕馭戎狄之畧也。

土魯番

土魯番。一曰土爾番。在火州西百里。漢車師前王

皇明世宗 卷八十一
地。車師前王居交河城。以河水分流繞城。因名焉。唐置西州交河郡。且析以爲縣。有安樂城。方一二里。地曠衍。四面皆山。城西二十里。崖兒城。可二里。居民百餘家。相傳故交河縣治也。永樂十一年。遣吏部員外郎陳誠使西域。十三年。土魯番遣使隨誠入貢。授酋長都督都指揮等官。宣德五年。都督僉事尹吉兒察及指揮僉事猛哥帖木兒等。率其孛來朝。請留京師。

賜居第。什器。歷正統天順。土魯番朝貢不絕。成化初。速檀阿力寔強。速檀華言王也。數引兵掠哈密。九年。遂入其城。虜王母及金印去。阿力子阿黑麻嗣。阿黑麻死。子滿速兒嗣。相繼擾哈密。及赤斤諸衛。是時夷酋所親信牙不蘭。娶哈密人火辛哈。即女。與寫亦虎仙妻爲女兄弟。陰相構結。正統八年。至誘忠順王拜牙。即走匿。而以火者他。只丁入哈密。密居守。巡撫都御史趙鑑。謬謂番夷信義可仗。犒以金繒。明年。土魯番遂索萬幣贖城印。躡肅州。嘉靖初。兵部尚書王瓊。招撫稍戢。十一年。土魯番速壇滿速兒。天方國速壇札刺丁。撒馬兒罕。速壇阿卜。寫亦。哈密都督米兒馬黑木。及額。即。訛。哈辛等。

皇明世法錄 卷八十一
各遣使入貢。共四千人。禮部言哈密貢期同朶顏三衛。

祖制三衛皆許入京。哈密則十人起送二人。今西域諸夷遠在萬里。素非屬國。而夷使過倍。番文二百餘通。皆以索牙木蘭爲辭。且求賞不貲。似借端窺伺。邊臣違例起送非法。至額卽卍哈辛。乃韃靼回夷。向未入貢。今亦遣五十餘人。疑並土魯番部落所託。請下督撫分別存留。以尊國體。

上可其奏。明年土魯番使虎力奶翁等。以甘肅內臣縱僕橫恣。懇部

勅遣大理寺少卿蔡經同科臣錦衣各一員。詣甘肅會督按官查勘。降罰有差。久之。滿速兒死。子沙速檀嗣。次子馬黑麻復據哈密。占種沙州二十四年。遣使求貢。并給地住牧。總督都御史張珩以聞。兵部議土魯番世濟克惡。今馬黑麻結婚瓦剌。潛耕屬衛。意在踵轍內訌。以謀泄求款。恐爲窺伺。甘涼之漸。宜諭以華夷界限。無妄乞。無盜種。無殘哈密。無苛貢夷。乃許通使。如其執迷。請卽閉關聲討。明年馬黑麻赴關納款。而土魯番貢使火者阿力克等。凡八百七十四人。扣嘉峪關。巡撫都御史傅鳳

翔總兵仇鸞居之甘州。先是土魯番撒馬兒罕哈密諸夷每假進貢留京商販。延至三四年。有旨禁諸夷私出館貿易。勒期遣還。仍

留甘州。其後諸夷貢不如期。且併居稠襍。屬楊博代鳳翔疏請。

上裁命量准百名。存留甘肅。聽減半給賞。餘諭出關。仍奪鳳翔等俸有差。嘉靖末。沙速檀潛掠北虜。中流矢死。弟馬速嗣請貢許之。隆慶時。馬速歿。馬黑麻嗣。其弟瑣非等並遣使來貢。禮部言一姓四使。

非令甲所載。姑各附一使於馬黑麻使中。示羈縻無拂。遠人嚮順。意報可。始甘肅無北虜患。專防西夷。土魯番最奸狡。自阿力以來。皆挾哈密邀利。隆慶後不復言哈密事。土魯番頗息肩。而海虜轉熾。甘涼間。其俗侯煖。鮮雨雪。宜麻麥。饒瓜果。羊馬室居奉佛多。僧寺。往陳誠使至其國。還言城西北百里有靈山。最大。夷人言此十萬羅漢涅槃處也。近山有高臺。芴寺。擁石泉。林木。從此入山。行二十里。至一峽。南有小土屋。從屋南登山坡。得石屋。奉小佛像五。前有池。池東山石青黑。遠望紛如毛髮。夷

人言此十萬羅漢洗頭削髮處也。緣峽東南行六七里，登高崖，崖下小山纍纍，峯巒秀削，其下白石成堆，似玉，輕脆不可握。堆中有若人骨狀，堅如石，色澤明潤。夷人言此十萬羅漢靈骨也。又東下石崖，得石笋，迸出如手足，稍南至山坡，石復瑩潔如玉。夷人言此辟支佛涅槃處也。周行羣山約三十餘里，悉五色沙石，光焰灼人，四面峻壑窮崖，天巧奇絕，然寡艸木，亦鮮鳥獸。自誠使後，土魯番漸張，旁嚙諸國，及關外七衛地，廣人庶，眎昔懸絕矣。弘治中，經畧嘗罷其貢，嘉靖二年後，貢期以五年有

駝馬玉石，鑲鐵金剛鑽，梧桐鱗柳青撒哈刺禪衣諸物，萬曆中並來貢。計土魯番去哈密凡千里，其鄰近為火州、柳城、黑婁。

火州

火州，漢車師前後王地也。自元帝置戊巳二較尉，屯田車師前王庭。和帝時，班超定西域，復置較尉，領兵五百人，居車師前部。高昌壁，以地勢高，厥得名。後魏初，闕伯周自稱高昌王，併於麴嘉。唐貞觀中，平其國，置西州及都督府。而西突厥據車師後王地，尋以來降，置庭州，領蒲類等縣。其後西州陷

吐蕃有回鶻雜居亦稱西州回鶻宋時因遣使貢獻太宗遣供奉官王延德等使高昌經望鄉嶺歷伊州乃至地極熱產五穀惟無蕎麥出貂鼠白氍繡文花氍布赤白塩蒲桃酒樂多琵琶箏篪俗好騎射婦人戴油帽謂之蘇幕遮用開元七年曆以三月九日爲寒食激水交湫爲戲佛寺皆唐賜額其國師子王避暑北庭山中出碣砂嘗有烟氣涌起至夕光焰若炬火照見禽鼠皆赤疑所繇稱火州者也元號畏兀兒隸馬哈木八

國朝號火州城方十餘里東七十里距柳陳城西百

里爲土魯番永樂七年嘗遣使朝貢十二年吏部員外郎陳誠使至言其國風土蕭條民居僧堂叅半皆零落東有荒城故址卽古高昌國治漢西域長史戊巳較尉所居處宣德五年火州王哈散偕土魯番萬戶賽因帖木兒柳東城萬戶瓦赤刺竝貢馬及玉璞爾後朝貢止稱土魯番云其城東距哈密西連亦力把力南接于闐北抵瓦刺東南至肅州一月程

柳陳

柳陳一名魯陳亦曰柳城漢名柳中延光二年以

班勇爲西域長史。將弛刑士五百人。西屯柳中。遂破車師。卽其地也。唐平高昌。至柳中縣屬西州交河郡。去哈密千里。中經大川。砂磧無水艸。馬牛過此輒死。大風倏起。人馬相失。道傍堆骸骨。白日鬼魅迷人。夷中謂之旱海。出川西行。至流沙河。上方二三里。四面多田園。流水環繞。灌木芴蔚。候煖俗醇。宜稼麥麻豆。有小蒲萄。甘甜無核。名鎖子蒲萄。人二種。回回男子削髮。戴小罩。刺婦女白衣裹頭。畏兀兒男子椎髻。嬾人蒙皂布垂髻於額。大抵皆胡服。

黑婁

黑婁在嘉峪關西。近土魯番。世締好。黑婁夷貢從土魯番入。其地男女山水艸木禽獸。並黑。宣德七年。始遣使朝貢。

于闐

于闐國東西五千里。南北千里。在沙州西南。去蔥嶺二百里。大畧蔥嶺以南。其國撒馬兒罕。最大。以北。于闐最大。于闐有河北流。與蔥嶺河合。東注蒲昌海。所名鹽澤。南出積石爲河源者也。其西水皆

西流注西海。國人每歲秋取玉於河。曰撈玉。夜時月光盛處。索美玉必得焉。河分爲三。有白玉、綠玉、黑玉之別。土宜五穀、桑麻、釀葡萄酒甚美。俗機巧事妖神。西五百里有比摩寺。云是老子化胡成佛之所。自高昌以西。國人深目高鼻。惟于闐貌不甚類胡。亦稍知禮節。相見輒跪。得問遺書。戴于首。乃發之。自漢武帝以來。中國詔書符節。傳以相授。工紡織。喜歌舞。善鑄銅器。以木爲筆。玉爲印。漢建武末。莎車王賢攻并于闐。徙其王俞林爲驪歸王。後于闐將休莫霸自立。傳兄子廣德。遂滅莎車。轉強

盛。順帝永建六年。于闐王遣侍子詣闕貢獻。梁天監九年。始通江左。十三年。獻波羅漢步障。隋大業中。頻朝貢。其王以王爲氏。唐貞觀六年。遣使貢獻。王姓尉遲。阿史那社爾旣平龜茲。勸于闐王伏闕。信入朝。上元初。以其地爲毘沙都督府。安史亂後。不復至。石晉天福中。其王李聖天。自稱唐宗屬。遣使來貢。紅鹽、鬱金諸物。冊爲大寶于闐國王。宋建隆二年。貢主一。以玉爲柙。乾德三年。僧善名善法來朝。賜紫衣。四年。王言破疏勒國。得舞象一。欲以爲貢。詔許之。天聖三年。貢玉帶、胡錦、獨峯橐駝。詔

聖明世法錄 卷八十一
給還其直。嘉祐八年。以其國王爲特進歸忠係順。砮鱗黑韓王。從所請也。于闐謂金翅烏爲砮鄰黑。韓蓋可汗之訛云。訖宣和數朝貢。永樂六年。其酋打魯哇亦不刺金遣使貢玉璞。十二年。吏部員外郎陳誠至其國。見徧鄰境頗單弱。人民僅萬計。皆避居山谷間。惟火州魯陳哈失哈力阿力稍有城邑。永樂後。西戎修貢。不敢相攻。始獲休息。行賈諸番國。益饒富。始于闐貢使每來。必携一寶璫。徃反眎之。鐵璫耳云。其來道流沙。踰三月程。無薪水。獨挈水行。是璫投以水。卽沸。故寶之。或曰其城東距

曲先衛。北連亦力把力。東北至肅州六千三百里。
亦力把力

亦力把力。或曰焉耆。或曰龜茲。在沙漠間。東距古沙州。西抵撒馬兒罕。南接于闐。北連瓦剌。東南至嘉峪關三千七百里。元時封馬哈木于此。名別失八里。世祖立宣慰司。以萬戶綦公直爲宣慰使。後置元帥府。領屯田。洪武二十四年。國王黑的兒火者遣使貢馬。命主事寬徹等報諭以書。永樂四年。王沙迷查干貢玉璞。且言哈密忠順王安克帖木兒。爲北虜鬼力赤毒歿。願率兵討之。

上喜特賜綵幣。十二年陳誠使其國。十六年夷目速哥克刺滿刺來朝言歪思弒其從兄納黑失只罕自立爲王徙其國東去更號亦力把力。正統二年其王也先不花遣人貢玉璞駝馬。景泰天順後入貢不絕。其國逐水艸住牧以氊罽爲帳寒暑坐臥於地無城郭宮室近蔥嶺有熱海然氣候常寒深山大谷六月飛雪平原夏秋稍暖王戴小單刺簪鷄翎衣禿袖衫削髮貫耳。甘肉酪或食稌麥俗獷而穢言語類畏兀兒。產銅鐵鉛雄黃胡粉氍毹呵魏白氎布又哈失哈力。宣德間遣十四人來朝貢

或曰卽阿方馬力

撒馬兒罕

撒馬兒罕古罽賓國在懸度山西。史稱地平溫和。有苜蓿梓竹漆蒲萄諸果。下溼生稻。其民雕文刻縷。治宮室織罽刺文繡布以金銀爲錢。出封牛沐猴孔雀珠璣珊瑚琥珀亦西域都會也。其先匈奴破大月氏大月氏西君大夏而塞王南君罽賓自漢武帝始通中國更立其王成帝時遣使來獻漢欲徃報杜欽說大將軍王鳳以罽賓更不屬漢之國四五。又歷頭痛之山身熱之阪繩索相引乃抵

縣度涉危路。以事無用。非久長計。卒罷遣如欽言。隋爲漕國。大業中貢方物。其王姓昭武。戴金牛頭冠。俗乘象。治浮屠法。唐貞觀中。罽賓獻名馬。王居脩鮮城。顯慶三年。以其地爲脩鮮都督府。拜其王都督。開元七年。遣使獻天文及秘方奇藥。元駙馬帖木兒主其國。東有養夷沙鹿海。牙賽蘭達失干。西有渴石迭里迷諸城。並隸焉。洪武二十年。國主帖木兒遣貢駝馬。厚賜之。二十二年。復貢馬。二十四年。貢海青。

賜勅加資二十四年。遣使迭力必失表貢馬二百匹。

初撒馬兒罕人商於漠北。自捕魚兒海見執。

上疑奸細。留中國久。得其情。遣歸國。其主因貢謝及之。二十八年。遣兵科給事中傅安郭驥等使西域。留撒馬兒罕。永樂五年。還。夷目哈里遣使隨貢方物。安等言帖木兒卒。孫哈里應嗣。

上賜哈里璽書銀幣。且諭祭帖木兒。賜安等衣。頃之。兀魯伯貢馬。復遣安報使。或曰。兀魯伯卽哈里。是歲。北平按察使陳德文亦自撒馬兒罕歸。德文洪武末使西域。遍歷諸境。采山川風俗。作詩歌一帙。進呈。

皇明世宗 卷八十一
上嘉之。賜馬擢僉都御史。洪熙元年。傳安始還國。請
勅命。吏部言。安歷年歲久。未經考覈。例不得授。
上曰。安留遠夷二十餘年。良苦。何例爲。命特與之。正
統二年。貢馬玉石。四年。貢良馬。色玄。蹄額皆白。
詔圖像。賜名瑞鵝。十三年。又貢方物。命宴其使。陝西
布政司。成化十七年。進二獅。至嘉峪關。夷使奏遣
大臣往迎。職方郎陸容言。獅子無用之物。在郊廟
不可爲犧牲。在乘輿不可備駟服。宜卻勿受。禮部
尚書周洪謨亦言。往迎非體。

上卒遣中使迎之。獅日食生羊二。醋酣蜜酪各二瓶。
參獅人光祿日給酒飯。二十二年。夷使泊六灣。還
國。迂塗至廣東。將往滿刺加市。後狃入貢。市舶中
使韋眷佐之。所在震駭。布政使陳選抗言。此西域
賈胡。恣爲奸利。願無墮其謀。開海道。貽諸番。笑部
覆得寢。而番禺縣民黃肆等。賄結韋眷。交通撒馬
兒罕等國。夷商滋擾。知縣高瑤搜沒番貨。鉅萬。選
具奏。竟爲眷誣。逮獄。道沒南昌。聞者惜焉。弘治二
年。撒馬兒罕遣使貢獅。所過繹騷。禮科給事中韓
鼎言。狎玩非宜。且供費不貲。宜罷遣。三
年。又繇南海貢獅及鸚鵡。禮部尚書倪岳言。南海

非西域貢道。請卻之。自後貢皆從嘉峪關入。嘉靖改元。撒馬兒罕等夷各進貢。陝西行都司伴送至甘州。驗放入關。各夷留西安。真定貿易。踰年始赴京。禮部尚書汪俊疏稱。各夷在途遷延。今後給賞。卽促起程。仍行陝直河南各夷還日。延住驛遞一日以上。住支廩給。

上從其議。二年始定。五年一貢。其國東西相距千里。在哈烈東北三千里。東去嘉峪關九千九百里。山川錢門峽阿木河最大。王白帽婦人以白繒纏首。尚回回教。有拜天屋。青石雕縷最精巧。經文裏以

羊皮書。以泥金。城市稠密。西南番賈多聚焉。禁酒。以手取食。貢物有番椀。矮納鎖服。腦砂。賽蘭珠。梧桐。鱗銀鼠皮。珊瑚樹枝。阿思馬亦花珠。道哈密。南史述鬱金香。獨出罽賓國。華色正黃而細。大似芙蓉。又北戶錄稱。唐初罽賓國獻俱佛頭花。爲中國所無。今不聞入貢。

沙鹿海牙

沙鹿海牙。在撒馬兒罕東五百里。城據小岡。西北臨山河。河名水站。勢衝急。有浮梁。其地南近山。三面皆平川。居人依崖谷。頗繁庶。西有大沙洲。可二

百餘里無水。卽有水不可飲。牛馬飲輒歿。有臭艸根株獨立高尺許。枝葉如蓋。春生秋歿。穢氣逼人。取生汁熬膏卽阿魏也。亦有細草以熬膏味如蜜。

賽蘭

賽蘭一作賽藍。去撒馬兒罕千里。在達失干東。城周三里有浮圖爲祈拜之所。四面平原流水環繞。草木豐茂。五穀蕃殖。夏秋間艸生黑蜘蛛甚小。毒甚。嚙人遍體作痛。號呼動地。土人誦呪禳解。以薄荷枝拂毒處。又以鮮羊肝遍察。經一晝夜痛息。膚如蛻。牛馬被傷輒歿。行人宿必近水避焉。元史序

薛塔刺海從征。賽蘭諸國並以礮立功。考會典西夷貢物。有賽蘭珠石。

達失干

達失干在賽蘭西。去撒馬兒罕七百里。城據平原甚狹小。四面平岡。溪流蜿蜒。多林木。土宜五穀。居民稠密。俗朴而饒。

渴石

渴石在撒馬兒罕西南二百六十里。城據大村。周十餘里。四面水田。東南近山。中有園林頗宏麗。故酋帖木兒駙馬居也。墻壁牕櫺飾以金碧琉璃。堂

四隅白石柱如玉。西行十餘里，多奇樹。又西三百里，大山屹立，中有石峽，兩壁懸崖如斧劈。行二三百里，出硤口，有門，石色如鐵。夷人指云：此鐵門關也。元太祖至東印度，駐鐵門關，有一角獸，形如鹿而馬尾，其色綠。作人言，以問耶律楚材，對曰：此瑞獸，名角端，能言四方語，好生惡殺。帝為班師，蓋其地近東印度矣。

迭里迷

迭里迷去哈烈二千餘里，在撒馬兒罕西南，新舊二城相去十餘里。王居新城，東距阿木河，河廣非舟不可渡，多魚。城內外居民僅數百家，孳畜蕃息，河東地隸撒馬兒罕。河西有蘆林，多獅子。

卜花兒

卜花兒在撒馬兒罕西七百里，城居平川，周十餘里，市里華庶，戶口以萬計。地曠衍，宜五穀、桑麻，天氣溫和，冬不附火，蔬菜不絕，產布帛，絲綿六畜，大類中國。

養夷

養夷在賽蘭撒馬兒罕亦力把力蒙古諸部落間，數相侵掠，無寧居，惟數百人，成孤城，四面皆亂山。

東北有大溪。西流長數百里。溪旁頽垣雜榛莽。

亦思把罕

亦思把罕廣袤近千里。於西南海中爲大國。四面皆海。西北多山。東南皆平沙。王居宏麗。城亦堅壯。產饒俗朴。食惟麥稌麥。粒麤而甘美。少布帛稻麥。多馬駝珠珀。亦有中國人流寓。時賈撒馬兒罕以取給。永樂中遣使四十四人來朝貢。

荅兒密

荅兒密國在海中不百里。人不滿千家。板屋有墻壘無城郭。產馬駝羊牛布褐。交易兼銀錢。亦用牛

耕。刑以箠朴。服屬撒馬兒罕。永樂中遣使十八人來朝貢方物。

賜大統曆文綺藥茶

失刺思

失刺思永樂間遣使朝貢。時遣官以綺幣磁器市馬於迤西撒馬兒罕。失刺思諸國宣德中貢使凡八人。

納失者罕

納失者罕東去失刺思數日程。皆舟行海中。其國有山林川澤魚蟲。城東平原饒水艸。可牧馬。馬有

皇明世法錄 卷八十一
數種。最小者高不過三尺。俗重僧。所至飲食之。顧尚氣健鬪。以不勝爲嗤鄙。永樂中遣使十人朝貢。

哈烈

哈烈一名黑魯。去嘉峪關萬三千里。撒馬兒罕西南。元駙馬帖木兒之子沙哈魯居焉。國人稱速魯檀。華言君王也。東有俺都淮八刺黑諸城並隸其國。王石城方十里。居平川。川廣百里。四面大山。王並山東北。疊石爲屋。屋若臺。無棟梁。並金碧雕嵌。窓垣粲如芴列。張重茵。錯以綺繡。上下相接。直呼名。王亦然。謁見微屈躬。道撒力馬力。一語握手。

或相抱爲禮。人善走。日行可三百里。候常燠。少雨。市中流水不斷。無正朔。時日月亦無斗斛。用權衡爲量。貿易以銀錢三等。稅十二。國用仰給。少炊爨。飲食無匕箸。不祀鬼神。祭先於墓所。男髡首。衣尚白。喪易青黑。亦無棺槨。產巴旦杏。鎖服花毯。金銀銅珊瑚琥珀珠翠馬獅黑白文獸白鹽。堅潤如水。晶琢磨爲器。沃以水和肉食。田美多獲。農不甚勞。每歲更休以完地力。宜桑與蠶。爲紈綺。細密踰中國。薨器尤精巧。贈予宴會。豐厚大抵西域城郭諸國。哈烈最瀆亂無耻。然有學舍。聚生徒。講習經義。

皇明世法錄 卷八十一
省刑薄歛寡訟好施兼務農桑則諸國不逮云洪
武二十五年遣使

詔諭酋長。

賜金綺。永樂七年夷目麼賚等朝貢十五年吏部員
外郎陳誠使其國正統二年指揮哈只等貢馬。

俺都淮

俺都淮西南去哈烈千三百里東北去撒馬兒罕
如之城在大村中。村廣百里。城居十一。曠衍無險
峻。土沃人稠稱樂土。永樂中嘗遣使朝貢。

八刺黑

八刺黑一名八黑在俺都淮東北城居平川周十
餘里南近山無險地廣物豐饒西南諸番賈聚焉
又八荅黑商其國奉佛浮圖壯麗如王宮永樂間
朝貢方物織皮絨罽香木疑卽八刺黑。

魯迷

魯迷或云地屬哈烈嘉靖三年其王遣使自甘肅
入貢獅子二西牛一都御史陳九疇以聞給事中
鄭一鵬言所獻皆非土性乞就彼犒遣以光聖德
杜窺伺不報明年禮部尚書席書奏魯迷不載王
會真贖莫辨頃土魯番數侵甘肅而甘州撫夷官

于魯迷數內查有夾帶土魯番夷衆其詐甚明請
善遣出塞仍治所獲姦謀。

詔鎮巡體覈五年復貢命畜獅牛內府仍留熟夷五
人飼之貢使頗索加賞云往買瓦刺費且二萬金
詔定五年一貢每貢起送十餘人貢物有玉石珊瑚
珠金剛鑽花帳子捨列孫皮花瓷湯壺羚羊角瑣
服二十三年北虜寇甘州總兵楊信以土官百戶
馬能言令魯迷諸國貢夷九十餘人前禦虜寫亦
阿力等九人歿焉都御史詹榮以聞

上從兵部議褫信職遠能于理以寫亦阿力歿事給

棺歛費送歸本國仍諭國王以優卹意

麻林

麻林國永樂十三年獻麒麟禮部尚書呂震請至
日率羣臣上表賀

上不許曰往翰林院修五經四書性理大書成欲上
表進賀朕則許焉麒麟有何損益其罷賀厚賜遣
之。

拂菻

拂菻國在嘉峪關外萬餘里按唐史云古大秦也
大秦國一名犁鞬居西海西亦云海西國漢時以

安息遮閔不得達。都護班超遣椽甘英使大秦。抵條支。臨海欲渡安息西界。舟人以入海。皆齋三歲糧。善令人戀慕。多歿。英聞亦止。桓帝延熹。大秦王安敦遣使自日南徼外。獻犀角象牙瑇瑁。始一通焉。晉太康中使來貢。唐貞觀十七年。拂菻王波多力遣使獻赤玻璃綠金精。下詔荅賚。其後臣屬大食。開元七年。因吐火羅大酋獻獅子羚羊。宋元豐四年。始通貢鞍馬真珠刀劍。元祐六年再至。

國朝洪武四年。遣其國故民捏古倫賚。

此為宮室之
一至于

詔諭之。尋遣使朝貢。其國地寒。土屋無瓦。王服紅黃。王以金線織絲布纏首。不尚戰鬥刑罰。罪重者盛以毛囊投諸海。鑄金銀為錢。無穿孔。面鑿彌勒佛背為王名。禁私造。產金銀珠。西錦千年棗。獨峯駝巴攬。然自漢侈言大秦。宮室皆以水晶為柱。珊瑚為椀。琉璃為墻。其土多出明珠。大貝。駭雞。犀。夜光璧。及火浣布。王宮三襲。門飾異寶。中門有金巨。稱作金人。立其端。屬十二丸。率時收一丸。落有眩人。能發火于顏。手為江湖。足墮珠玉。有善醫。能開腦。出蟲。愈目。眚。或織水羊毳。野蠶繭。為海西布。及氍毹。

皇明世法錄 卷八十一
旣毘毘扇帳之屬。道多猛虎獅子。羊種土而生。臍屬地介。馬擊鼓驚之。乃絕。他語多不經。或云國西有弱水流沙。近西王母所居。幾於日所入。從條支西渡海。曲一萬里。蔥嶺以西國最大。循海而南。與交趾外夷接。又水道通益州永昌。故永昌出異物。

天竺

天竺國一名身毒。漢史稱西通大秦。在月氏東南數千里。臨恒水。卑溼暑熱。乘象戰。脩浮屠道。別國數十王。並以身毒爲名。張騫使大夏。見邛竹蜀布。云市之。身毒。武帝遣使十餘輩。間出西南。指求爲

昆明所閉。不得通。至明帝夢金人。以問羣臣。或曰西方有神。名曰佛。長丈六尺。而黃金色。乃遣使天竺。問佛道法。併圖像。其教始入中國。桓帝延熹中。頻從日南徼外來獻。梁天監初。王屈多遣長史竺羅達奉表獻琉璃唾壺。襍香吉貝。南史作中天竺。其外復有天竺迦毘黎國。後魏宣武時。南天竺國王。婁羅化獻駿馬。凡去代三萬一千五百里。隋煬帝銳通西域。唯天竺拂菻不至。唐武德中。王尸羅逸多討四天竺皆臣之。貞觀十五年。遣使獻火珠。鬱金菩提樹。自稱摩伽陀王。後朝貢相繼。乾封中。

五天竺的
是異境若
得履至焉
亦是快事

五天竺王並來朝獻。南天竺瀕海。北天竺距雪山。東天竺際海。與扶南林邑接。西天竺與罽賓波斯接。中天竺居其會。並直蔥嶺。南有別國數十。置王曰舍衛。開戶東向。開元時。南天竺獻五色能言鳥。乾元末。河隴陷。遂絕。周廣順三年。西天竺僧隆滿多等十六族來貢馬。而滄州僧道圓。自晉天福中詣西域。歷乾德三年還。得佛舍利一。水晶器具。葉梵經四十夾來獻。凡在塗十年。住五印度六年。五印度卽天竺也。明年僧行勸等百五十七人詣闕言願至西域求佛書。許之。開寶後。天竺僧數持梵

夾來。八年東印度王子穰結說囉朝貢。天竺法王歿。太子襲位。餘子皆出家爲僧。不復居本國。有王子曼殊室利。隨中國僧至。館於相國寺。善持律。後附賈人船歸。不知所適。雍熙中。胡僧密坦羅奉北印度王及金剛坐王那爛陀書來。自云東行六月。至大食國。又二月至西州。又三月至夏州。天聖二年。西印度僧獻梵經。賜紫方袍。大畧其國土沃民淳。不茹葷。宗瞿曇學。戒貪嗔姪妹。七日一禮拜天。每食輒誦經坐臥。置天王爲惺惺法。王與大臣服錦罽頂爲螺髻。剪餘髮下垂。鑊鉢鈴螺。襍奏爲梵

樂男子髡首穿耳懸璫跣足服色尚白製如袈裟
致詞以砥足摩踵展敬工天文星曆產犀象貂羆
璫珣金扇火齊金剛鑽與大秦諸國交市火齊如
雲母作紫金色有光耀裂之薄如蟬翼積之則如
沙穀重沓金剛鑽似紫石英可切玉或云以肉投
大澗底飛鳥食肉遺糞得之恒水源出崑崙甘美
下有真鹽色正白如水精始嶺南香山有澗曰濠
鏡爲諸番互市地夷商襍處珍貨克物易交闢天
竺僧渡海來歷三年達濠鏡諸夷信其法遂奉約
束戒行亦足重云

榜葛刺

自蘇門答刺順風二十晝夜至榜葛刺在海西南
或曰西天有五印度國榜葛刺卽東印度也從翠
藍島入察地港更小舟行五百里有鎖納兒港有
城池市聚始遵陸抵國可三十五里西通金剛寶
座國曰沼納樸兒乃釋迦得道之所永樂二年國
王靄牙思丁遣使朝貢六年上金葉表九年至太
倉命行人往宴勞之十二年王蹇弗丁奉金葉表
來貢麒麟等物正統三年復至其國地廣人稠沃
饒甲於他境王及酋長皆回回人祝髮白布纏首

圓領長衣。綵帨皮屨。風俗朴厚。人好耕殖。一歲二熟。賦十二。刑笞杖徒流。官有印。軍有糧。陰陽醫卜。百工技藝。畧備市用銀錢海貳。價定打手。雖萬金不改悔。別有一種印度。不食牛肉。飲食男女異處。夫死不嫁。妻亡不再娶。孤寡衆輪贍之。五嶺山最高大。氣候恒熱如夏。曆有十二月無閏。產鑛。鑿翠羽。瑠璃。桑漆。尤廣。絲綿製鎗剪絕巧。布數種。有潤四五尺者。兜羅錦。背面皆毳絨。厚可五分。白樹皮布。膩潤與鹿皮等。椰莖爲酒。檳榔爲茶。波羅蜜味甘大如斗。優人衣黑白花衫。縈帨。佩珊瑚琥珀。

纓絡歌舞侑觴。能作百戲。以鍊索繫虎行市中。入門解索。裸而搏虎。交撲數回。就繫如故。人爭以肉啖虎。永樂間使至禮甚厚。禁用酒。以薔薇露和香蜜水飲之。貢物有。戩金。琉璃器皿。撒哈刺。兜羅錦。烏麥泥。藤。竭。糖。霜之屬。

沼納撲兒

沼納撲兒國。在印度中。卽古佛國也。永樂十八年。國王亦不刺。金數。侵榜葛刺。遣使齎勅諭之。因來朝貢。

黑葛達

黑葛達國小而貧。平川廣野，多艸木，禽獸稀少。市肆牛羊蕃育，用銖錢交易。俗尚佛，畏刑。宣德中嘗遣使十人朝貢，又有白葛達在西海中。小國土瘠亦尚佛。宣德七年國王遣使朝貢。

天方

天方古筠冲地，舊名天堂，一稱西域。自忽魯謨斯四十晝夜到國，乃西海盡處。或云從陸路抵中國。凡匝歲。永樂七年因中使鄭和往使，以獅子麒麟來貢。宣德中遣其臣沙噶貢方物。正德十二年再至。嘉靖四年禮部言天方等番國入貢，陝西都

司稽留半年以上，方為具奏。發冊所進玉石多疵惡，而夷所私貨皆良。請行巡按御史查覈。自今無得多帶玉石，以擾驛路。其方物印封案驗，不堪治都司官罪。明年火者馬黑木等入貢，禮部主客郎陳九川驗玉稍苛，夷有後言。鴻臚通事胡士紳修郟訐稱九川索受玉璞。

上令逮訊。會大學士費宏製玉帶，邏騎執舍中兒去。宏疏辯係尚書鄧璋鼎答，與天方前失玉璞輕重不倫。溫旨慰之。而九川竟謫戍。十七年天方貢使請遊覽中國，禮部奏非例，疑有狡心，詔絕之。初定

五年一貢。有駝馬鐵角皮。鼈班兒香諸物。萬曆中復至。俗辮髮。穿白長衫。用回回曆。較中國前後差三日。風景融和。四時皆如春。田沃稻饒。以馬乳拌飯。日落聚爲夜市。建寺層次高上如塔。月初生拜天。號呼稱揚以爲禮。有馬高八尺。名天馬。按杜環經行記。大食國士女偉壯。閎麗。衣裳鮮潔。一日五時。必禮天堂。可容數萬人。市閉輻湊。萬貨豐賤。大約與天方國相類。

默德那

默德那卽回回祖國。地接天方。有城池宮室田園。

市肆五穀繁滋。大類江淮間。初國王謨罕。慕德生而神靈。西域諸國並臣伏焉。尊爲別譜。拔爾華言。天使也。其教以事天爲本。而無像。日每西向拜天。有佛經三十藏。凡三千六百餘卷。書兼篆艸楷。西洋諸國皆用之。隋開皇中始傳入中國。尤精星曆。亦解醫藥。音樂織文。雕縷器具精巧。洪武元年。改太史院爲司天監。又置回回司天監。二年爲徵元。回回曆官鄭阿黑等十一人赴京議曆法。占天象。給廩賜服有差。宣德中。國王遣使隨天方國朝貢。正德中。回回人于永進秘方得幸。拜錦衣衛都指。

揮同知而御馬監西海子。設養虎回夷三名。嘉靖
登極。以給事中鄭一鵬疏屏之。并歸甘州。所簡進
回回女你兒干等。奸夷于永竟。庚戌籍其家。今國
人多附舶香山濠鏡。灣貿易。其人善鑿識。每於賈
胡海市中。廉得奇琛。故稱識寶曰回回。而種類散
處南北。爲色目人甚夥。並恣目胡鼻。用白布纏首。
寄居哈密者尤勁悍。俗以蜜爲酒。以牛爲菜。好歌
舞。夫婦配合。必取水淋沐。親歿用布囊屍入棺。鼓
樂導至墓。去棺底掩以土。妻子至以水潑之。祈速
朽爲孝。蓋近墨氏之流。非同類。殺不食。禁食豕肉。
賈居送千里不持糧云。

阿速

阿速在西海中。爲大國。城倚山面川。川南流入海。
涼暄適節。有魚塩耕牧之利。俗尊鬼好施。惡爭鬪。
亦饒物產。鮮飢寒。寇盜聚落。多撒馬兒罕。天方諸
國人。永樂中嘗遣使百十二人來朝貢。

沙哈魯

沙哈魯在阿速西南海島中。山川環抱。居民旅處
村落。畜產孳息。王及酋長城居瓦屋。佞佛。耻鬪。俗

號淳直西域賈胡來市海中得奇貨不惜酬數倍沙哈魯人不識也永樂間遣使朝貢凡七十七人

火刺札

火刺札國頗微弱四圍皆山鮮艸木水流曲折亦無魚蝦城僅里許多板屋俗尚佛喜中國磁器針線永樂十四年嘗朝貢

吃力麻兒

吃力麻兒山卑水淺西南傍海東北林莽多毒蟲猛獸得中國雄黃麝香磁器甚喜不事耕農好射獵有達巷無市肆交易無期用銅錢永樂中嘗遣

使十一人來朝貢方物惟獸皮鳥羽罽褐之屬

敏真誠

敏真誠國亦大多高山深水縛木為渡以日中市諸賈畢集見中國磁漆器爭欲得之產駝馬異香永樂中國王遣四十人來朝貢

白松虎兒

白松虎兒舊名速麻里兒國中無大山亦鮮林木無猛獸毒蟲之害先是嘗有白虎出松林中不傷

人畜旬月後不復見國人以為神虎父老曰此西方白虎降精因更其國號白松虎兒永樂中使十

此國看來如須弥中芥子

六人來貢

加異勒

加異勒西戎小種。居人不及千家。貧窶常備食鄰國。永樂中王者麻里奈那遣使貢方物。宣德間再朝貢。

西番

論曰羌部散處其強不能當虜而與虜合則彼遂得借以樹敵。撤我藩籬。故招番以扞虜。自隆萬後始煩規畫。洮河間每苦脊脊多事。而虜猶不得遽收為用以

中朝先後經制尚足以縻其心也。虜搶番之徑既開而轉與羌習吾曾不能制羌歿命而聽虜挾羌為市。蠶食日深將貽張日甚。策莫若嚴假道之禁。以攜羌虜之交。是在邊臣早為綢繆地耳。若乃法王佛子藉口壤奠厚往薄來。無惜小費而妨大計。則廟堂久有成謨矣。

西番古吐蕃地。本羌屬。按漢史西羌出自三苗地。近南岳及舜徙之三危。河關以西濱於賜支。至于河首綿地千里。賜支者禹貢所謂析支也。南接蜀漢徼外蠻夷。西北鄯善車師諸國。逐水草產牧。氏

族無定。以父名母姓爲種號。強則分種稱酋豪。其兵長在山谷。果於觸突。以戰歿爲吉。耐寒苦得西方。金行之氣焉。按今西番地爲都指揮使司二。曰烏思藏。曰朶甘。爲指揮使司一。曰隴答。爲宣慰使司三。曰朶甘。曰董卜韓胡。曰長河西魚通寧遠。爲招討司六。曰朶甘思。曰朶甘隴答。曰朶甘丹。曰朶甘倉溱。曰朶甘川。曰磨兒勒。爲萬戶府四。曰沙兒可。曰乃竹。曰羅思端。曰別思麻。爲千戶所十七。曰朶甘思。曰刺宗。曰孛里加。曰長河西曰多八三孫。曰加八。曰兆日。曰納竹。曰倫答。曰果繇。曰沙里可。

哈忽的。曰孛里加思。曰撒里土兒。曰參卜郎。曰刺錯牙。曰泄里壩。曰濶則魯孫。並洪武初置。其後增設招討司。有曰直管安撫司。有曰別思寨。曰襍谷。曰長寧。長官司。有曰襍道。曰達思蠻。又有加渴瓦寺。金川寺。韓胡禡怯列寺。蕃僧有封灌頂國師者。自洮岷階文西固南達松茂。族種甚繁。在階文者名武都羌。在洮者吐谷渾羌。而松茂間東西阻河。列砦四十有八。殆不勝紀焉。始生番出歿如風雨。而屬番納馬中茶頗馴服。後寢通生番剽劫。自虜據西海起松山及莽刺彌望皆虜。反出番南。番不

皇明世法錄 卷八十一
堪虜私饋皮幣曰手信。歲時加送曰添巴。至充部落嚮導。番虜一家藩籬盡撤。亦大煩經制矣。風俗大抵朴魯。君臣爲友。上下一心。食酪衣氊。居毳帳。間用板屋。或壘石巢居如浮屠。以梯上下。人居其中。上貨下畜。高十餘丈。謂之碉房。卑者二三丈。名鷄籠。音樂尚琴瑟。好狠鬪。務耕牧。貴壯賤弱。尊釋信。詛重利。懷恩喜啖生物。能耐飢寒。亦天性也。階文番據層崖深箐。食稗豆。跳躍如獼猴。相傳番人無腓易奔。以憑險不畜騎。洮番甲馬頗整。卽面中一二鎗挺立不撓。衣多用璫璣紅綠緣飾。戰屈以

聖奴爲大誓。鑿院露其首。居恒據險發冷箭。擣石截軍餉。日就關堡索飲。見燵起卽蛾聚攢食。曰和番。每執堡軍爲質。山川大者崑崙山可跋。海黃河折支。溫水物產珍異。有犛牛名馬。羴羊。天鼠皮。獨峰駝。而仰給中國茶麝香爲命。無茶則發腫病。且歿。無麝香則苦蛇蠱。殘麥禾。故自昔以閉關絕貢。可制西番。貢物多畫佛。銅佛。銅塔。舍利。足力麻。鐵力麻。璫璣珊瑚。犀角。左髻毛。纓酥油。刀劍。遮甲麻。衣道川。陝其長河。西朶甘思等。並繇雅州入境。每渝約多人。且不如期。隆慶三年著令。各三年一

貢。赴京多者八人。以次遞減。至四人。餘各留邊候賞。而賞額每處多者千餘人。少不下百人。所費不貲。率奸商積猾。冒誥勅。混索金繒。且往來互販。以漁利。所貢獻亦殊不成。享廟堂。雅知其敝。卒不能禁。而別種在雲南。鐵橋北。名古宗。一云細腰蕃。高皇帝既下雲南。裂吐蕃爲二十三支。分屬郡邑。轄以土官。府則麗江永寧州。則北勝。浪蕩等。各控制之。皆効順。惟我願指永寧所轄外。有所謂野西番者。稍不易制。古宗種鳩舌。瓣黑短裳。用羆牛或羊毛。撚線爲之。婦人用青白磁珠。與碑磔相間。懸于

哈密

論曰。初置哈密。本以綰轂西戎。隔絕羌虜。乃脫脫終鮮血胤。而罕慎。陝巴。並以非類。爰立貪醜。不堪擔荷。至拜牙。卽直從叛。如流水。而欲強之歸國。爲我外藩。庸可冀乎。揚旌萬里。侈言興繼。祇令小醜得以城印爲市。靡敝中土。甚無謂也。余攷前後規畫。獨馬端肅。襲擊牙蘭。最爲得策。惜以闡外違制。迄無成功。彭王兩經畧。並以材指聞。彭躁而疎。王伎而復。適以疆事供陰陽報復之用。而功罪翻局。若反覆掌。可心寒矣。或欲靡西寧海虜。西制土魯

番北控瓦刺。尤屬左算。端肅有言。西域賈胡規利。不善騎射。古未有能爲中國大患者。如虜得志。蠶食番族。是爲開門延寇。近事可鑒。議者至以哈密不復。埒鄧隲棄涼州。則光武之閉玉門。曾不足法歟。

哈密古伊吾廬地。自秦攘郤戎狄。西不過臨洮。至漢武始築。令居以西。置酒泉。及武威。張掖。燉煌。四郡。開玉門。通西域。斷匈奴右臂。隔絕南羌。月氏。繇是單于失援。遠遁。而幕南無王庭。王莽後。西域復沒屬匈奴。明帝取伊吾廬地。置宜禾都尉。屯田。再項。或以松膏澤髮。成縷下垂。俗大近西番云。

西域自建武至延光三絕三通從燉煌西出玉

通西域。自建武至延光三絕三通。從燉煌西出玉門陽關涉鄯善北通伊吾千餘里。從伊吾北通車師前部高昌壁千二百里。為西域門戶。伊吾地宜五穀桑麻蒲萄。其北柳中並膏腴。漢常與匈奴爭車師。伊吾制西域焉。晉為涼州牧張實竊據。歷後魏西域復通。隋煬帝因裴矩進圖記躬度玉門關置伊吾且末鎮。唐初名西伊州。貞觀六年更號伊州。伊吾郡隸隴右道。安氏之亂盡沒吐蕃。大中後張義潮以瓜沙伊肅等十一州來歸。五代曰胡盧磧。小月支遺種仲雲居之。史稱即漢屯田處。地無

水而常寒。多雪。每天煖。雪銷乃得水。在沙州西。元封其孽。忽納失里爲威武王。頃之改封肅王。卒。弟安克帖木兒嗣。

國初於張掖置甘州五衛。酒泉置肅州衛。武威置涼州衛。湟中置西寧衛。別置衛四。爲山丹。永昌。鎮番。莊浪。千戶所三。爲高臺。鎮夷。古浪。自陝西蘭州渡河千五百里。至肅州。肅州西七十里。爲嘉峪關。永樂二年。以安克帖木兒貢馬。

詔封爲忠順王。併卽其地。建哈密衛。先後畫關。以西置衛七。曰哈密。曰安定。曰阿端。曰赤斤。蒙古曰曲

先。曰罕東。曰罕東左。而哈密北西。東去肅州。西去土魯番。各千五百里。北數百里。抵瓦剌。以天山爲界。授夷目馬哈麻火只等指揮等官。分居苦峪城。三年。王卒無子。兄子脫脫俘蠻夷郎。命護歸嗣王。賜金印誥命。以地當西域咽喉。天方等三十八國入貢。必取道哈密。令譯上諸番貢表。偵察向背。用華人爲長史。紀善。稍畱內藩。而部夷襍居。有回回。畏兀兒。哈刺灰三種。各立都督佐之。四年。賜王脫脫及其祖母速哥失里母妃等綺幣。是歲。王爲祖母所逐。勅復立爲王。六年。王脫脫及祖母各遣使

朝貢而脫脫以沉湎衆不附。九年卒。勅都指揮哈納爲都督僉事守哈密。是歲封脫脫從弟免力帖木兒爲忠義王。

賜印誥玉帶。十二年。行在驗封員外郎陳誠使西域。還言哈密城在平川可三四里。東北二門。王稱速檀。有衆數百戶。多蒙古回回種人。城北大山餘三面。並曠衍。地鹹鹵。宜稔麥。豌豆。耕用糞壤。產馬駝。玉石。鑛鐵。大尾羊。陰牙角。俗獷悍。好利。西域貢使經哈密。輒索道路錢。乃聽出入。洪熙元年。貢硫黃。上諭虜中既有火藥。臨敵宜謹備。因勅宣大總兵知

之。宣德初。遣使祭哈密。故王免力帖木兒命其姪卜答失里嗣封忠順王。三年。以下答失里孱弱。復立免力帖木兒之子脫歡帖木兒嗣。忠義王共理國。正統四年。貢玉。求紵絲。予四表裏。是時瓦剌強數侵哈密。哈密懼。稍持兩端。壘書諭母背德。終不悛。至拘畱漢人轉鬻。使至多。暴橫。或歐。或防護軍較邊。臣請絕貢。詔曲貸。天順元年。賜王朝服。母妻。畱。嘉寇四年。賜紙金箔。薑桂茶礬。而忠順王再傳。爲孛羅帖木兒。天順末。見弑于其酋者林無子。王母孛溫答失力。畱國事。遭虜。亂加思蘭殘破國人。

皇明十法錄 卷八十一
奔潰來貢。動以千百。意邀宴賞。郵傳頗疲。供給成化元年。從禮部尚書姚夔等議。令哈密歲一貢。以八月初旬。驗放入關。多不過三百人。內起送三十人赴京。其土魯番亦力把力等。或三年五年入貢。經哈密者。及期偕來。無過十人。勅哈密王母撫緝流亡。稱朝廷厚意。二年。兵部奏王母以虜虜加恩。蘭侵掠。避居赤斤古峪。今虜退。宜勅復還哈密。報可。三年。以把塔木兒爲右都督守哈密。把塔木兒本畏兀族。故忠義王脫歡帖木兒外孫也。八年。把塔木兒歿。子罕慎赴京。嗣都督。貢駝馬加賞而上。

魯番時強盛。控絃可五萬。其速檀阿力尤雄黠。九年。挾哈密掠赤斤諸夷。王母不從。遂見虜及劫金印去。哈慎竄苦峪城。甘肅撫臣婁良以聞。兵部尚書白圭言。哈密爲我西藩。土魯番無故凌奪。不救則赤斤諸衛。盡爲蠶食。嘉峪外皆敵疆。而禍中甘肅寢深。請集廷議。恢復會昌侯孫繼宗等議。遣使諭諸衛。以唇齒輔車。及乘速檀阿力入貢。

賜勅令自新。因舉高陽伯李文。右通政劉文習夷情。勅往甘肅。規復哈密。文等至。則調罕東赤斤番兵數千。駐苦峪。不敢進。謬言阿力欲乘虛搗二衛。宜

皇明世法錄 卷八十一
還兵自爲守。而弛擔入朝。阿力始輕中國。益侵內屬諸夷。十二年遣使赤兒米郎等來貢。且致書鎮巡飾罪。稱王母已死。須朝使至。卽歸金印。城池然特謾語。枝梧。殊無還意。其冬更鑄哈密印。賜罕慎。明年于苦峪立衛居之。給土田及牛具穀種。十四年阿力歿。子阿黑麻稱速檀。年尚穉。甘肅撫臣王濬請乘間納罕慎。十八年罕慎入哈密。嗣忠順王罕慎貪殘。國人缺望。西域諸貢使苦要索。亦有違言。二十三年。瓦剌酋阿沙赤等相讐殺。西走據哈密。尋引去。弘治元年。奸回誘阿黑麻攻哈密。阿

黑等亦壯。乃曰。罕慎非脫脫族。安得王。王故應我。佯好語。罕慎聯姻。至哈密城下。頂經盟。誘殺之。亦未敢頌言。據哈密遣使入貢。請代領西域職貢。且乞大通事。往和番。兵部尚書馬文升議。阿黑麻與哈密各有分地。安得相併。以非虜之強。我屢卻。欵何小。酋輒與我構。且憫然王也。姑許。照例入貢。請勅阿黑麻還王母及金印。歸我哈密。四年遣哈密夷目寫亦虎仙齋勅諭阿黑麻。時王母已歿。阿黑麻亦悔懼。上金印及所據城。

詔褒予金幣。陞寫亦虎仙爲都督僉事。文升謂夷俗

重種類且服元久。哈密同城有回回等三種。而北
山又有小列禿野七克力強虜數枝。侵逼必得元
孽嗣封。可懾諸番。乃行求忠順近屬。得曲先安定
王姪陝巴。五年。取據哈密三種夷目。奄克孛刺等
合詞奏保使嗣王輔。以奄克孛刺阿木郎未給冠
服。諸番索賞。陝巴不得。阿木郎更勾引哈刺灰夷
掠土魯番牛馬。阿黑麻怒。六年。復以兵入哈密。支
解阿木郎虜陝巴及金印去。事聞。命兵部侍郎張
海都督僉事。紱謙經理之。會阿黑麻前遣夷目寫
亦滿速兒等四十餘人修貢至京。事下。廷議。通事

王英言。罕東及野七克力諸夷。怨土魯番欠骨。撫
而用之。皆吾兵也。西域使者方扣關倚互市爲利。
我聲阿黑麻罪。謝弗與通。令彼窮而歸。怨皆吾間
也。而廷議皆欲命海以檄往。如土魯番歸陝巴聽
予貢否。卽留前使勿遣。而絕其後使。

上從之。海等至甘州。遣哈密夷齋勅往諭阿黑麻歸
陝巴。不報。乃脩嘉峪關。捕哈密奸回通阿黑麻者
者二十餘人。戍廣西。請絕西域貢。七年春。海等不
俟命輒還。

上怒其無功。且不進圖本。竝逮下獄。海降山西叅政

熙地里以
行兵彼謀
者窳矣

謙閒住。文升請安置前使。寫亦滿速兒等於閩廣。稍用王英策。閉嘉峪關。令西域諸夷歸怨阿黑麻。以孤其勢。而阿黑麻復入哈密。自稱可汗。大掠罕東諸夷。謀言用雲梯攻肅州。且躡甘州。文升曰。是直以虛聲恐喝耳。土魯番至哈密。十數程。中經黑風川。哈密至苦峪。又數程。皆絕水艸。貢使往返。馱水行。我第整師旅。謹斥埃埃。俟彼至肅州。出奇縱擊。以逸待勞。虜殆可盡。項之阿黑麻西去。令夷目牙蘭以四百騎據哈密。文升曰。是可襲而執也。召肅州撫夷指揮楊翥至計事。撫其背曰。清。夷情悉。

西域道里。今欲擒斬牙蘭。策安出。翥言罕東有間。道可進兵。不旬日達哈密。文升曰。如若言以罕東兵三千爲鋒。我師三千後繼。各持數日熟食。兼程襲之。若何。翥稱善。文升即屬甘肅巡撫許進。如前策。調兵食。遣副總兵彭清統銳卒。繇南山馳至罕東。急令罕東諸番兵乘夜倍道襲牙蘭。八年冬。進及總兵劉寧抵肅州。駐師嘉峪關外。遲罕東兵不至。乃偕彭清循大路行。以水艸乏絕。不得馳。牙蘭調知宵遁。惟餘番夷八百。登臺自保。師入哈密。得陝巴妻女。并牛羊三千。斬級六十而還。我士馬乏。

糧多物故。文升以出師違節制。徒取空城。大失望。議牙蘭不獲功。無可錄。獨軍士遠征勞苦。宜陞賞。上念邊臣冒險出塞。特陞進左副都御史。加寧左都督。清都督僉事。而西域亦自是頗憚中國。九年。阿黑麻破哈密。令夷目撒他兒及奄克孛刺住刺木城。奄克孛刺密結瓦刺小列禿。襲斬撒他兒。還守哈密。阿黑麻偏師合圍。舉火示小列禿來援。乃卻走。而奄克孛刺使來貢。多請乞。至訐懇曹郎禮部尚書徐瓊疏逐之。十年秋。阿黑麻以絕貢失互市。窘甚。令其兄馬黑上書言西域諸國不得貢且歸。

怨。今悔過願還。陝巴及金印易前四十餘使。予貢如故。文升言虜挾詐。俟陝巴金印至甘州。始取寫。亦滿速等於閩廣。是冬起前左都御史王越。加太子太保。總制甘涼等處邊務。經畧哈密。十一年。越出河西。而陝巴至甘州。令三種都督回回則寫亦虎仙。畏兀兒則奄克孛刺。哈刺灰則拜迭力迷失。共佐陝巴。奄克孛刺以罕慎弟與陝巴不協。乃妻陝巴以罕慎女。結好。是秋賜陝巴蟒玉大帽。復封爲忠順。而釋寫亦滿速兒等西歸。亡何。越卒。哈密三種人久厭兵。而哈刺灰以射獵爲生。不願還哈

密文升請許留家之半肅州十二年春以兵護陝
巴歸哈密而土魯番諸夷許復入京朝貢勞賜良
厚陝巴嗜酒培尅諸部阿孛刺等咸貳十七年春
更陰構阿黑麻迎其次子真帖木兒來王哈密陝
巴棄城走沙州守臣遣指揮董傑及奄克孛刺往
諭夷衆迎陝巴還阿孛刺不從傑等遂擒斬阿孛
刺并其黨六人餘怖服乃別令都指揮朱瑄勒兵
送陝巴復王而以真帖木兒還土魯番真帖木兒
時年十三其母亦罕慎女也會阿黑麻死諸兄讐
殺真帖木兒懼不敢還願依奄克孛刺守臣恐與

陝巴嫌使居甘州而其兄滿速兒尋定國亂自立
矣正德元年陝巴歿子拜牙卽嗣真帖木兒尚留
未遣三年滿速兒稱速檀朝貢上書求真帖木兒
兵部議質所愛不予五年走出城追獲之七年冬
令哈密三都督送真帖木兒西還八年春至哈密
獨奄克孛刺止不行寫亦虎仙滿刺哈三護至土
魯番以國情輸滿速兒潛誘拜牙卽叛中國拜牙
卽淫暴心怵屬夷謀害欲挾奄克孛刺往不從奄
克孛刺遂奔肅州拜牙卽竟棄城走土魯番滿速
兒令夷日火者他只丁及寫亦虎仙滿刺哈三取

金印守哈密。九年正月。滿速兒率衆至。分據刺木等城。而河西大饑窘。真帖木兒且謂甘州城南黑河。可引灌城。日夜聚謀。侵甘肅。遣番文鎮巡。索金幣萬贖。哈密城印。總制都御史鄧璋等以聞。會四川都御史彭澤甫平羣盜。

詔移總督甘肅統延寧固原諸鎮兵。經畧土魯番夷。給事中王江等言甘肅既有總制。宜罷遣不聽。十年春。澤至甘州。而土魯番寇赤斤苦峪。恣殺掠。復遺書索金幣。澤度滿速兒強。未易兵定。乃以繒綺刺千白金器。遣通事火信同寫亦虎仙入土魯番。

說令和好。滿速兒喜。許增幣歸金印。城池澤不俟報。輒上言事定乞歸。卽召還掌院事。滿速兒謀知兵罷益驕。四出侵掠。關外諸衛及結瓦刺寇我河西。且遣人索所許增幣歸印。十一年甘肅巡撫李昆以雜幣二百。貽滿速兒。令送拜牙。卽還國。質留來使虎都六撒者。兒縻其意。滿速兒聞質。二夷怒。令火者。他只丁牙木蘭復占守哈密。而身引萬騎犯肅州。游擊芮寧禦之。敗沒亡七百騎。虜迫城下。哈密回夷居肅州城。頗爲內應。兵備副使陳九疇廉得其情。收繫諸奸回。及都督失拜煙答等。凡衷

甲者捶殺之。嬰城守。調屬夷兵。劫其老營。而潛遣使結瓦剌。擣巢穴。破其三城。滿速兒狼狽走。副總兵鄭廉及奄克孛刺尾擊。則敗之瓜州。九疇遂盡發。寫亦虎仙傾陷哈密狀。滿速兒復請和。巡撫李昆以聞。時方命彭澤及中使張永視師。疏至。罷遣而滿速兒實無意和。九疇與昆異議。兵部尚書王瓊脩郤。澤雅右昆。且心害九疇。能日媒孽西北事。奸夷覘知。本兵指而失拜。煙答子米兒馬黑麻方入貢在京。巧賄權幸。突入長安左門。訟冤。下錦衣衛。會兵部三法司奏行河西訊報。瓊因發澤欺罔。

辱國。及陳九疇輕率激變罪。十三年逮昆。九疇至。請廷鞫。幾殺澤。九疇大學士楊廷和善澤。得與九疇並削籍。昆謫浙江副使。十四年刑部會訊。并脫寫亦虎仙歿。

上幸會同館。寫亦虎仙以秘術干進。得賜國姓。隨上南征。嘉靖改元。復論斬歿獄中。而臺省交章劾王瓊挾私忌功。廷和陰主其中。起彭澤爲兵部尚書。九疇亦以僉都御史巡撫甘肅。瓊坐謫戍榆林。三年滿速兒大舉入寇。以二萬騎入甘州。九疇率衆先登力戰。解甘州圍。乘夜倍道。間抵肅州。夾擊破。

皇明世法錄 卷八十一
之殺火者他只丁衆譁滿速兒中流矢歿矣遂聞
上河西危急。

上方遣兵部尚書金獻民都督杭雄濟師至蘭州聞
捷用九疇議遷發夷使閉關絕貢擢賞有差而滿
速兒故無恙也四年牙木蘭復據哈密侵肅州又
入沙州起原任大學士楊一清督陝西軍務初哈
密二種避仇內徙一居肅州東關一居金塔寺諸
處九疇議移肅州北境棄地以杜後患一清以各
夷一旦外徙不北合瓦刺必西連察台徒足召釁
議遂寢尋一清召入盡出平涼所羈夷使往諭土

魯番令悔罪歸我哈密而楊廷和坐議禮罷彭澤
亦去職諸新貴人張璁桂萼等用事方讐廷和知
王瓊故怨之言哈密不靖繇彭澤澤以廷和曲庇
惟急用瓊西鄙乃可寧也七年春起瓊兵部尚書
兼右都御史代王憲總督瓊上書辨澤九疇事言
滿速兒實不歿按驗當九疇誣罔璁萼擬坐斬并
罪廷和刑部尚書胡世寧力爭九疇雖上首功失
實然其人忠勇可任有功河西最爲土魯番所忌
得謫戍邊勒澤及金獻民歸里時哈密當殘破後
餘衆千餘走入塞守城撫存之歲給耕種以請乞

煩兵備副使趙載稍裁額而滿速兒敗歸亦數使牙木蘭請款其年牙木蘭率衆內附牙木蘭者本曲先夷幼爲土魯番所掠黠而善兵滿速兒倚之與寫亦虎仙等專伺我虛實且數盜邊至是滿速兒令牙木蘭據沙州索羈留貢使且率帖木哥土巴攻肅州以遲回欲殺之牙木蘭懇率帳房二千老稚萬人乞白城山金塔寺住牧未報土魯番酋虎力納咱兒糾瓦刺侵肅州遊擊彭濬禦卻之八年土魯番貢獅子願歸哈密城及所掠求牙木蘭瓊奏哈密旣歸乞令失拜煙答子米兒馬黑木守

哈密貢使二十四人遣入京放所羈各番男女兒千人安插沙州土巴帖木哥部夷五千四百人于白城山哈密都督札吉孛刺部夷在肅州東關赤斤都督掌卜達兒子鎖南束在肅州北山金塔寺罕東都指揮枝丹在甘州南山下兵部議廷臣頗言哈密難守詹事霍韜力言置哈密者離戎虜之交以藩屏內郡或難其守遂欲棄之將甘肅難守亦棄不守乎

太宗之立哈密因元遺孽力能自立借虛名以享實利今嗣三絕矣天之所廢誰能興之唯於諸夷中

求雄傑能守城印戢夷落者。即因而立之。無規規忠順後為也。胡世寧時為兵部尚書。言先朝不惜棄大寧交趾。何有于哈密。况初封忠順為我外藩。而自罕慎以來。三為土魯番所虜。遂狎與戎比。而疲我中國士馬。耗財老師。轉令戎得挾以邀索。國初封元孽和寧王。順寧王。安定王。正與此等耳。安定又在哈密之內。近我甘肅。今存亡不可知。我一切不問。而獨戀戀哈密者何也。臣愚謂宜專守河西。謝哈密無煩中國。便。又言牙木蘭本屬夷歸正。安得索之。土魯番所仗。寫亦虎仙火者。他只丁

今竝斃。而牙木蘭復來歸。是無奈我何。璫等力主瓊議。安插諸夷。肅州境內獨留牙木蘭不遣。如世寧言。瓊為滿速兒風諭朝廷威德。九年滿速兒遣虎力奶翁及天方諸夷使貢方物。復索牙木蘭。謀言俟奶翁歸。即約諸番侵肅州。會虎力奶翁歸道病歿。瓦刺又攻其鄙。我稍息肩。來降人言番酋欲以哈密城與失拜烟答妻管理。兵部因許通貢。著令三年或五年為期。夷使十二入京。餘留塞上。是後名存哈密。而金印遂失。忠順王拜牙。即終不可復。亡何哈密竟為土魯番所據。安插諸衛夷皆為

薦食失故土。住牧河西塞。而非虜窟西海瓦刺巢。北山河西三面竝苦寇盜。哈密殘夷虎爾的等。迫求內附。督撫王夢弼等疏請分發甘肅寄住哈密。都督拜言。孛刺等各部下。鈐束選克夷軍。通事食糧隨操。守臣頻歲謹備。羌胡無暇及關外事矣。

赤斤蒙古

赤斤蒙古。周西戎。戰國月氏。秦漢屬匈奴。武帝取爲酒泉燉煌二郡。晉屬郡曰晉昌。唐初屬瓜州。廣德後。歿於吐蕃。宋入西夏。元仍瓜州屬沙州路。其地有白山。饒艸木禽獸。產金駝馬肉菹容。胡桐律。

國朝永樂二年。故韃靼丞相苦木子塔力尼。率所部五百人來歸。置赤斤蒙古千戶所。以塔力尼爲千戶。賜誥印。尋陞衛。進塔力尼指揮僉事。十年。叛寇者的罕走匿赤斤。命右庶子楊榮同豐城侯李彬往討。以道險艱。轉餉罷。制諭塔力尼。明年遂擒老的罕來獻。

上悅。厚勞之。遂指揮同知。亡何卒。子且加失旺嗣。宣德七年。命居所部韃人祖失加卜。等于平涼。正統五年。且加失旺累陞都督僉事。明年朝使往哈密。不護出疆。而都指揮革古者西略沙州。勅諭改圖。

以偏瓦刺乞內遷肅州白城山不許。已請建寺其地。守臣謂予寺不已。且予巢却之。且加失旺卒。子阿速嗣。始瓦刺也。先自阿速父時求婚。至是要往受聘。阿速以聞。復請避地內徙。

詔朕向許爾父自擇便往。且見許赤斤世守地。奈何棄之。爾第保險自備。無滋悔。是時瓦刺強。赤斤蒙古與沙州罕東諸衛名內屬。然陰與虜市。至受平章等秩。累詰責不能禁。十一年指揮同知鎖合者赴闕求携部歸命。

上遣還。下其事。總兵任禮。先是苦木娶于西番生塔力尼。又娶于韃靼生鎖合者。及革古者。乃分所部爲三帳。自領中帳。而令塔力尼領左。隸以西番人。瑣合者領右。隸以韃靼人。至且加失旺父子相繼長。赤斤部衆強。欲併右帳。因讐殺鎖合者。以窘自歸。頃之。死。子切塔兒嗣。而哈密使者道赤斤。爲部酋劫掠。阿速不能戢。我兵捕首惡械送京師。景泰中。阿速歷陞左都督。五年。瓦刺也先以書誘脇赤斤諸衛。阿速白其書。諭勿與通。成化二年卒。子瓦刺答兒嗣。會哈密王母避居赤斤苦峪。諭還故地。六年。從夷族請。以瓦撒塔兒叔乞巴失加卜丁二

人爲指揮僉事佐之。明年瓦撒塔兒卒。子賞卜達兒嗣。十四年。以幼懦衆推指揮加定晉秩代視事。是後土魯番陷哈密。恣掠赤斤。其酋挈印并部落東徙。肅州南山卯來河泉及迤北金塔寺。正德十年。土魯番侵甘州。鹵赤斤人畜千計。奪嗣印去。以都御史彭澤撫賞送歸。而種人散走塞下。衛遂虛。嘉靖七年。兵部尚書王瓊議撫屬夷。查赤斤部可千餘人。以賞卜達兒子鎖南東襲父職朝貢。

安定 阿端

安定韃靼別部也。地廣袤千里。東爲罕東。北抵古

沙州。產駝馬玉石。俗以馬乳釀酒飲之。亦醉。廬用羶帳。無城郭。洪武七年。撒里畏兀兒安定王卜煙帖木兒遣使來朝。貢鎧甲刀劍。

賜金綺。分其酋長爲四部。曰阿端。阿真。苦先。帖里。各賜印。而卜煙帖木兒

賜銀印。仍稱安定王。明年獻元所授金銀字牌。因置安定阿端二衛。分統四部。永樂二年。表貢馬五百匹。令河州衛指揮康壽往受之。壽言令甲諸番貢馬。償以茶。官爲轉輸。令安定遠請給布絹報可。亡何王爲曲先攻殺部落潰散。十一年其孫亦攀丹

復故封。

賜印誥遣使諭祭前王。二十二年。中使往西域。道歿于賊。都指揮李英率兵至罕東。問故言賊中使者。安定曲先酋也。英進擊安定。俘斬千餘。獲駝馬牛羊巨萬。曲先遁去。宣德二年。以安定僧賞竹領真爲國師。給

誥命銀印。是後王與國師並入貢。而國師外復有禪師。自永樂後留西寧。正統時都指揮汪清疏其窺伺內地。

詔歸安定輔其王。九年安定酋那南奔等掠曲先。勅

亦攀丹約束部落。十一年卒。子領占幹。此兒嗣王尚幼。以其叔輟思叅已爲都指揮僉事佐之。成化中爲土魯番殘破。弘治初安定王子千奔嗣。王遣使入貢。會議求哈密忠順王近裔。詭稱安定同系。以姪陝巴承襲。尋見虜土魯番而千奔終弘治貢使相望。正德七年。北虜亦卜剌據西海。破安定。奪其誥印。種人汪纏爾加等寄跡河州歸德。十年安插西寧。嘉靖中尚書王瓊行訪求原守墳塔國師。藏卜哈巴及汪纏等。令住牧迤北沙糖川部。酋襲指揮職領其衆。而安定王苗裔無傳。阿端久沒莫

皇明世宗金 卷八十一
知其處

曲先

曲先東抵安定。北距肅州。爲古西戎部落。或云亦月氏地也。元置曲先荅林元帥府。洪武四年。設衛以土酋散西思爲指揮同知。頃之。爲土兒只巴所攻。并入安定。居阿真地。永樂四年。徙曲先衛治藥王淮。其後指揮散卽思及安定酋劫殺中使洪熙。改元。命都指揮李英窮追。踰崑崙西數百里。乃還。宣德二年。復掠西域貢使。都督史昭率安定罕東兵討之。進馬贖罪。還其俘。令居故部。指揮那那罕。

表言部落五百餘。爲安定所虜。餘衆潰居西番江。不敢歸。

詔安定王遣還復業。其後屢入貢。正統二年。夷目黑麻。訛遣指揮火丁貢方物。成化後。以土魯番及亦不刺。侵掠部落。走匿烏思藏。而衛人牙木蘭。劫於土魯番。率衆蹂哈密。其兄脫蹄聚帖木哥女弟。收衛印部衆二百餘。依帖木哥等於沙州。嘉靖七年。以疑貳。擁帳三千。與罕東衛帖木哥土巴等來歸。詔安插牙木蘭於湖廣江夏。遂鬻田宅爲大賈。胡而曲先故地盡失矣。其俗服色尚白。喪易以青。產珊瑚。

皇明世宗 卷八十一
珊瑚珠名馬硃砂。

罕東

罕東在赤斤蒙古南，亦西戎部落。洪武二十五年，涼國公藍玉追捕寇至罕東，將佐諫勿深入，不從。縱兵阿真川，土酋哈魯等皆遁去，不見虜而還。三十年，酋長鎖南吉刺思遣使入貢，立罕東衛，以鎖南吉刺思爲指揮僉事。永樂二年，與其兄答力襲等十六人貢馬，進指揮使，以答力襲爲指揮同知，夷目奴奴爲指揮僉事，各賜冠帶鈔幣。歲脩貢不絕。洪熙元年，指揮那那奏部夷負內供馬，迤赤斤

而官兵方討曲先相驚，欲爲亂，令守臣招撫之。曲先之役，夷目班麻思結率所部從，得首虜駝馬獻。宣德七年，以功授指揮使。九年，罕東別部劄兒加邀劫使者，命都督劉廣史昭討之，劄兒加自歸還所掠貢馬。謝正統五年，赤斤蒙古言指揮鎖合者殺人，迤罕東且誘其部落，哈密亦言罕東擅相攻鹵人畜，兩

詔諭之。十四年，班麻思結言哈密來侵。

上念諸夷數告言構怨，而哈密又累誘瓦剌盜邊。

詔都御史馬昂納忠順王，無仇罕東，且令偵虜，成化

九年土魯番劫哈密城印。高陽伯李文等調罕東赤斤兵數千。往苦峪關無功歸。時罕東諸夷皆困土魯番。而夷酋奄章先與諸族讐殺。遁居沙州。部落日蕃。班麻思結卽奄章子也。至是其孫只克以沙州衛旣廢。請卽其地立罕東左衛。詔從之。以只克嗣祖秩領衛。尋晉都督僉事。弘治八年。土魯番掠沙州。只克請救。尚書馬文升議發罕東兵往襲。以失期功不就。自是土魯番每入寇。假道罕東。令給食。而亦不刺安定。數掠其貲。罕東益微。弘治時。款肅州塞。請卹矣。正德中。兵備陳九疇擊卻土魯

番。沙州稍得生聚。復歸耕牧。比牙木蘭再入。殘破其酋土巴等。並叛附。時只克卒。孫日羔刺嗣爲都督。嘉靖初。與罕東它酋帖木哥土巴先叛。附土魯番者。皆來歸。尚書王瓊請分其衆。半居肅州。自城山半居。威虜仍擇壯勇練習。番上聽日羔刺約。月餉累萬石。而各夷以城堡未築。環居肅州。二十八年。巡撫楊博始葺威虜金塔寺。諸城堡給以耕。爨安插番帳。凡七百餘。凡部落男婦三千四百餘人。爲申約禁。番漢交通。惟朔望入城市。易四十二年。著令日羔刺等五年一貢。沙州古燉煌地。唐天寶

末陷西戎。張義潮以州歸順。建歸義軍。卽以義潮
爲節度使。梁後曹姓代立。迄宋朝貢。永樂二年。置
衛。正統中都督喃哥以困瓦剌。率部屬戶二百餘
來歸。命居山東平山。東昌二衛。給糧及耕地。有差
衛遂廢。或曰。二罕東皆在沙州城嘉峪關外。夷二
罕東最弱。

皇明世法錄卷之八十一

終

